

Der Kärwaplatz

Wos is denn in Burgfarnbach lous
wou is denn ez die Kärwa blouß
su härt mä jedn zweitn froung
und manchn sugoar ganz schäi floung.

A Baustell is der Kärwaplatz
es lametiern is für die Katz
mit dem Gedankn — dort wärd baut
is mä seit Jahren scho vertraut.

Mä konns verstäih, daß alles stöhnt
wall su a Plätzla halt verwöhnt
su schäi zentroal — direkt im Ort
dou gäiht mä freili net gern fort.

Wos anders findn woar net leicht
doch hot mä schließlich ez erreicht
daß alles ba der Schoul aufstellt
des paßt, walls in die Ferien fällt.

Denn mitn Unterricht wärs aus
ba Kärwamusik glei vurm Haus
obwohl mä waß — und ziemlich gout
die Kinder hättn gwieß ka Wout.

Nei is der Platz — die Kärwa alt
su wärd si sicher jeder bald
genau su wohl fühl'n wäi letzts Joahr
wous wärkli widdä zünfti woar.

Denn wer Burgfarnbachs Bürger kennt,
der waß, daß däi su schnell nix trennt
vo ihrer Kärwa — walls in Färth
für tausende zum Treffpunkt wärd.